

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ZAKLJUČAK
o pokretanju postupka po službenoj dužnosti

Sarajevo,
Oktobar 2009. godine



Broj: 01-05-26-033-1-II/09
Sarajevo, 21.10.2009. godine

Na osnovu člana 27., a u vezi sa čl. 12. 14. 16. 18. и 32. Zakona o konkurenciji (Službeni glasnik BiH", br. 48/05, 76/07 i 80/90), Konkurencijsko vijeće na 96 (devedesetšestoj) sjednici održanoj dana 21.10.2009. godine, je donijelo

Z A K L J U Č A K
o pokretanju postupka po službenoj dužnosti

1. Pokreće se postupak po službenoj dužnosti za ocjenu koncentracije, u smislu člana 16. i člana 18. Zakona o konkurenciji, između privrednog subjekta "OPTIMA Grupa" d.o.o. Banja Luka, ul. Kralja Alfonsa XIII br.9, Banja Luka i privrednih subjekata "ZOVKO" d.o.o. Žepče, Ljeskovicica bb, Žepče i "ZOVKO OIL" d.o.o. Žepče, Goliješnica bb, Žepče.
2. Postupak će se provesti u skladu sa Zakonom o konkurenciji i podzakonskim aktima koji regulišu oblast tržišne konkurencije i drugim relevantnim propisima.
3. Stranke u ovom postupku su dužne na zahtjev Konkurencijskog vijeća dostaviti svu relevantnu dokumentaciju vezanu za ovaj predmet.

O B R A Z L O Ž E N J E

Konkurencijsko vijeće je slijedom informacija objavljenih na web stranicama www.24sata.info i www.ekapija.ba provelo preliminarne aktivnosti na prikupljanju podataka u vezi moguće koncentracije između privrednog subjekta "OPTIMA Grupa" d.o.o. Banja Luka, ul. Kralja Alfonsa XIII br.9, Banja Luka (u daljem tekstu: "OPTIMA Grupa") i privrednih subjekata "ZOVKO" d.o.o. Žepče, Ljeskovicica bb, Žepče (u daljem tekstu: "ZOVKO") i "ZOVKO OIL" d.o.o. Žepče, Goliješnica bb, Žepče (u daljem tekstu: "ZOVKO OIL").

Na web stranici www.24sata.info dana 14.05.2009. godine i na web stranici www.ekapija.ba dana 08.06.2009. godine objavljeno je da je privredni subjekt "OPTIMA Grupa" kupila deset benzinskih pumpi od privrednog subjekta "Zovko" Žepče, od toga osam pumpi na području Federacije Bosne i Hercegovine i dvije na području Brčko Distrikta Bosne i Hercegovine. Uvidom u podatke objavljene na web stranici "Zovko" grupe www.zovko.com, Konkurencijsko vijeće je utvrdilo da se privredni subjekti "ZOVKO" i "ZOVKO OIL" bave djelatnošću veleprodaje i maloprodaje naftnih derivata.

Konkurencijsko vijeće je aktom broj: 01-05-26-510-1/09 od 09.06.2009. godine i aktom broj: 01-05-26-510-7/09 od 29.06.2009. godine zatražilo podatke iz registra Osnovnog suda u Banja Luci za privredni subjekt "OPTIMA Grupa", a od Odjeljenja registra Općinskog suda u Zenici, aktom broj: 01-05-26-510/09 od 09.06.2009. godine, podatke za privredne subjekte "ZOVKO" i "ZOVKO OIL". Prema podacima koje je Konkurencijsko vijeće dobilo iz registra Osnovnog suda u Banja Luci, aktom zaprimljenim dana 22.06.2009. godine pod brojem: 01-05-26-510-4-I/09 i aktom zaprimljenim dana 10.07.2009. godine pod brojem: 01-05-26-510-8-I/09, nije bilo registrovanih statusnih promjena kod privrednog subjekta "OPTIMA Grupa". Prema podacima koje je Konkurencijsko vijeće dobilo od Odjeljenja registra Općinskog suda u

Zenici, aktom zaprimljenim dana 22.06.2009. godine pod brojem: 01-05-26-510-5-I/09 i aktom zaprimljenim dana 22.06.2009. godine pod brojem: 01-05-26-510-6-I/09, nije bilo registrovanih statusnih promjena kod privrednih subjekata "ZOVKO" i "ZOVKO OIL".

Konkurencijsko vijeće je od Porezne uprave Federacije Bosne i Hercegovine, Kantonalnog poreznog ureda Zenica, aktom broj: 01-05-26-510-10-I/09 od 22.07.2009. godine i Kantonalnog poreznog ureda Tuzla aktom broj: 01-05-26-510-9-I/09 od 22.07.2009. godine, tražilo podatke o prometu nekretnina u 2009. godini u vlasništvu privrednih subjekata "ZOVKO" i "ZOVKO OIL". Aktom zaprimljenim dana 12.08.2009. godine pod brojem: 01-05-26-510-13-I/09 dobijeni su samo podaci od Kantonalnog poreznog ureda Tuzla i to podaci o zaključenju ugovora između kupca privrednog subjekta "OPTIMA Grupa" i prodavca privrednog subjekta "ZOVKO", o prodaji bezinske pumpne stanice sa ekonomskim dvorištem, naselje Solina, Tuzla, zaključen dana 22.05.2009. godine, o prodaji benzinske pumpe i prateće opreme u Brijesnici Velikoj, općina Doboj Istok, zaključen dana 15.04.2009. godine, o prodaji benzinske pumpe "Ormanica", Gradačac, zaključen dana 15.04.2009. godine, kao i podaci o zaključenju ugovora između kupca privrednog subjekta "OPTIMA Grupa" i prodavca privrednog subjekta "ZOVKO OIL" o prodaji benzinske pumpe u Tinji, zaključen dana 30.04.2009. godine.

Radi utvrđivanja obaveze podnošenja prijave koncentracije, u skladu sa članom 14. Zakona o konkurenciji (u daljem tekstu: Zakon), Konkurencijsko vijeće je od Agencije za posredničke, informatičke i finansijske usluge a.d. Banja Luka, aktom broj: 01-05-26-510-2-I/09 od 09.06.2009. godine, tražilo dostavu podataka o ukupnom prihodu za 2008. godinu privrednog subjekta "OPTIMA Grupa", a od Agencije za finansijske, informatičke i posredničke usluge d.d. Sarajevo, aktom broj: 01-05-26-510-14-I/09 od 13.08.2009. godine, podatke o ukupnom prihodu za 2008. godinu privrednih subjekata "ZOVKO" i "ZOVKO OIL". Agencija za posredničke, informatičke i finansijske usluge a.d. Banja Luka je aktom zaprimljenim dana 12.06.2009. godine pod brojem: 01-05-26-510-3-I/09 dostavila finansijske izvještaje za 2008. godinu za privredni subjekt "OPTIMA Grupa" iz kojih proizilazi da je ukupan prihod istog iznosio 25.141.127,00 KM. Agencija za finansijske, informatičke i posredničke usluge d.d. Sarajevo je aktom zaprimljenim dana 18.08.2009. godine pod brojem: 01-05-26-510-15-I/09 dostavila finansijske izvještaje za 2008. godinu za privredne subjekte "ZOVKO" i "ZOVKO OIL" iz kojih proizilazi da je ukupan prihod privrednog subjekta "ZOVKO" iznosio 1.006.826,00 KM, a privrednog subjekta "ZOVKO OIL" 108.146.029,00 KM.

Na osnovu izloženog Konkurencijsko vijeće je ocijenilo da postoji osnovana sumnja da je privredni subjekt "OPTIMA Grupa" pripojio dijelove privrednih subjekata, "ZOVKO" i "ZOVKO OIL", odnosno benzinske pumpe u njihovom sastavu, a što se smatra koncentracijom u smislu člana 12. stav 1. pod a) Zakona, te da istu nije prijavio u skladu sa članom 16. Zakona.

U smislu člana 16. Zakona učesnici koncentracije su obavezni podnijeti Prijavu namjere koncentracije, kada ista ispunjava propisane uslove iz čl. 12. i 14. Zakona, koji se odnose na oblik koncentracije odnosno na ukupni prihod u godini koja je prethodila koncentraciji na svjetskom, odnosno na tržištu Bosne i Hercegovine.

Slijedom navedenog Konkurencijsko vijeće je donijelo Zaključak o pokretanju postupka po službenoj dužnosti, kao u dispozitivu.

U cilju ocjene predmetne koncentracije učesnici koncentracije su obavezni dostaviti Konkurencijskom vijeću tražene podatke i dokumentaciju, predviđenu odredbama Zakona, u određenim rokovima. Za dostavljanje netačnih ili pogrešnih podataka od strane učesnika koncentracije Konkurencijsko vijeće može izreći novčane kazne, u skladu sa članom 49. stav (1) tačka c) Zakona. Tokom postupka u cilju komplementiranja podataka Konkurencijsko vijeće može tražiti podatke i od drugih nadležnih institucija, konkurenata na tržištu, kao i trećih osoba.

Konkurencijsko vijeće će tokom postupka, analizom podataka, u smislu člana 17. Zakona, primjenom kriterija utvrđenih Zakonom, ocijeniti negativne i pozitivne učinke predmetne koncentracije.

Pored toga, Konkurencijsko vijeće će analizirati učinke koje je ta koncentracija proizvela na relevantnom tržištu, kao i da li je koncentracija stvorila ili ojačala dominantan položaj koji za posljedicu ima značajno narušavanje tržišne konkurencije, u smislu člana 13. Zakona ili ima pozitivne učinke koji se ogledaju u jačanju postojeće konkurencije na relevantnom tržištu.

Nakon provedenog postupka Konkurencijsko vijeće će donijeti konačno Rješenje u skladu sa članom 18. Zakona.

Pouka o pravnom lijeku

Protiv ovog Zaključka nije dopuštena žalba.

Predsjednik

dr. Stjepo Pranjić

Dostavljeno:

1. "OPTIMA Grupa" d.o.o. Banja Luka
2. U spis
3. Arhiva